

選舉典第一卷

選舉總部彙考一

有虞氏

帝舜始闢門求賢

按書經虞書舜典詢于四岳闢四門

疏

正義曰堯舜之聖求賢久矣今更言

開門是開其未開者謂多設取士之科以此廣致衆賢也

蔡傳

舜既告廟卽位乃謀治於四岳之官

開四方之門以來天下之賢俊

周

周制諸侯歲貢士而進賢使能總之於天官冢宰

按禮記射義古者天子之制諸侯歲獻貢士於

天子天子試之於射宮其容體比於禮其節比於樂而中多者得與於祭其容體不比於禮其節不

比於樂而中少者不得與於祭數與於祭而君有慶數不與於祭而君有讓數有慶而益地數有讓

則削地

陳注

鄭氏曰三歲而貢士舊說大國三人次國二人小國一人疏曰書傳云古者諸侯之於

天子也三年一貢士一適謂之好德再適謂之賢賢三適謂之有功一不適謂之過再不適謂之

傲三不適謂之誣

按周禮天官冢宰以八統詔王馭萬民三曰進賢

注賢有善行也

訂王昭禹曰以德則可久以業

則可大禮義由之以出政事由之以立朝廷待之以尊民心之所願興宜使之在位故進之馭以進賢則民知德之不可不務故大司徒以賢制爵則民謹德 賈氏曰有賢在下君當招之民當

舉之

四曰使能

注

能多才藝者

訂

愚按人各有能用之然後見如伯夷能典禮使作秩宗足以究其典

禮之能后夔能典樂使教胄子足以究其典樂之能君知量能以任使人之有能者孰不欲自效以見其能

漢

高帝十一年詔舉賢才

按漢書高祖本紀十一年二月詔曰蓋聞王者莫高於周文伯者莫高於

齊桓皆待賢人而成名今天下賢者智能豈特古之人乎患在人主不交故也士奚由進今吾以天之靈賢士大夫定有天下以爲一家欲其長久奉宗廟亡絕也賢人已與我共平之矣而不與我共

安利之可乎賢士大夫有肯從我游者吾能尊顯之布告天下使明知朕意御史大夫昌下相國相國鄭侯下諸侯王御史中執法下郡守其有意稱明德者必身勸爲之駕遺詣相國府署行義年有而弗言覺免年老癯病勿遣

文帝二年以日食詔舉賢良方正能直言極諫者按史記文帝本紀二年冬十一月晦日有食之十二月望日又食上曰朕聞之天生蒸民爲之置君以養治之人主不德布政不均則天示之以菑以誠不治乃十一月晦日有食之適見於天菑孰大焉朕獲保宗廟以微眇之身託於兆民君王之上天下治亂在朕一人唯二三執政猶吾股肱也朕下不能理育羣生上以累三光之明其不德大矣令至其悉思朕之過失及知見思之所不及白以告朕及舉賢良方正能直言極諫者以匡朕之不逮因各飭其任職務省繇費以便民朕旣不能遠德故慙然念外人之有非是以設備未息今縱不能罷邊屯戍而又飭兵厚衛其罷衛將軍軍太僕見馬遺財足餘皆以給置傳

文帝十五年詔有司舉賢良文學士按漢書文帝本紀不載按鼂錯傳詔有司舉賢良文學士錯在選中上親策詔之曰惟十有五年九月壬子皇帝曰昔者大禹勤求賢士施及方外四極之內

舟車所至人迹所及靡不聞命以輔其不逮近者獻其明遠者通厥聰比善戮力以翼天子是以大禹能亡失德夏以長楸高皇帝親除大害去亂從並建豪英以爲官師爲諫爭輔天子之闕而翼戴漢宗也賴天之靈宗廟之福方內以安澤及四夷今朕獲執天下之正以承宗廟之祀朕既不德又不敏明弗能燭而智不能治此大夫之所著聞也故詔有司諸侯王三公九卿及主郡吏各帥其志以選賢良明於國家之大體通於人事之終始及能直言極諫者各有人數以匡朕之不逮二三大夫之行當此三道朕甚嘉之故登大夫於朝親諭朕志大夫其上三道之要及承惟朕之不德吏之不平政之不宣民之不寧四者之闕悉陳其志毋有所隱上以薦先帝之宗廟下以興愚民之休利著之於篇朕親覽焉觀大夫所以佐朕至與不至書之周之密之重之閉之興自朕躬大夫其正論毋枉執事烏虜戒之二三大夫其帥志毋怠

景帝後二年詔令廉士入官者減算 按漢書景帝本紀後二年夏五月詔曰人不患其不知患其爲詐也不患其不勇患其爲暴也不患其不富患其亡厭也其唯廉士寡欲易足今訾算十以上乃得官廉士算不必衆有市籍不得官無訾又不得官朕甚愍之訾算四得官亡令廉士久失職貪夫

長利

武帝元狩六年詔舉獨行之士 按漢書武帝本紀元狩六年六月詔遣博士循行天下舉獨行之君子徵詣行在所

元封五年詔察舉吏民有茂材異等可爲將相及使絕國者 按漢書武帝本紀元封五年夏四月詔曰蓋有非常之功必待非常之人故馬或奔蹏而致千里士或有負俗之累而立功名夫泛駕之馬跼馳之士亦在御之而已其令州郡察吏民有茂材異等可爲將相及使絕國者

昭帝始元元年閏月遣故廷尉王平等五人持節行郡國舉賢良問民所疾苦冤失職者 按漢書昭帝本紀云云

宣帝元康元年詔舉修身通學明先王之術者 按漢書宣帝本紀元康元年秋八月詔曰朕不明六藝鬱于大道是以陰陽風雨未時其博舉吏民厥身修正通文學明於先王之術宣究其意者各二人中二千石各一人

元康四年通舉茂材異倫之士 按漢書宣帝本紀四年正月遣大中大夫彊等十二人循行天下

存問鰥寡覽觀風俗察吏治得失舉茂材異倫之士

元帝建昭四年詔舉茂材特立之士 按漢書元帝本紀建昭四年夏四月詔曰朕承先帝之休烈夙夜栗栗懼不克任間者陰陽不調五行失序百姓饑饉惟烝庶之失業臨遣諫大夫博士賞等二十一人循行天下存問耆老鰥寡孤獨乏困失職之人舉茂材特立之士相將九卿其帥意毋怠使朕獲觀教化之流焉

成帝鴻嘉二年詔舉敦厚有行義能直言者 按漢書成帝本紀鴻嘉二年春三月博士行飲酒禮有雉蜚集于庭歷階升堂而雌後集諸府又集承明殿詔曰古之選賢傳納以言明試以功故官無廢事下無逸民教化流行風雨和時百穀用成衆庶樂業咸以康寧朕承鴻業十有餘年數遭水旱疾疫之災黎民婁困於饑寒而望禮義之興豈不難哉朕既無以率道帝王之道日以陵夷意乃招賢選士之路鬱滯而不通歟將舉者未得其人也其舉敦厚有行義能直言者冀聞切言嘉謀匡朕之不逮

永始三年詔舉惇樸遜讓有義行者 按漢書成帝本紀永始三年正月己卯晦日有蝕之詔曰天

災仍重朕甚懼焉惟民之失職臨遣太中大夫嘉等循行天下存問耆老民所疾苦其與部刺史舉惇樸遜讓有行義者各一人

後漢

和帝永元五年詔申飭二千石選舉及令司隸刺史糾察 按後漢書和帝本紀永元五年春三月戊子詔曰選舉良才爲政之本科別行能必由鄉曲而郡國舉吏不加簡擇故先帝明敕在所令試之以職乃得充選又德行尤異不須經職者別署狀上而宣布以來出入九年二千石曾不承奉恣心從好司隸刺史訖無糾察今新蒙赦令且復申勅後有犯者顯明其罰在位不以選舉爲憂督察不以發覺爲負負亦憂也非獨州郡也是以庶官多非其人下民被姦邪之傷由法不行故也

安帝永初二年詔舉有道術明災異陰陽之數者 按後漢書安帝本紀永初二年秋七月戊辰詔曰昔在帝王承天理民莫不據璇璣玉衡以齊七政朕以不德遵奉大業而陰陽差越變異竝見萬民饑流羌貊叛戾夙夜克己憂心京京間令公卿郡國舉賢良方正遠求博選開不諱之路冀得至謀以鑒不逮而所對皆循尙浮言無卓爾異聞其百僚及郡國吏人有道術明習災異陰陽之度璇

璣之數者各使指變以聞二千石長吏明以詔書博衍幽隱朕將親覽待以不次冀獲嘉謀以承天
誠九月庚子詔王主官屬墨綬下至郎謁者其經明任博士居鄉里有廉清孝順之稱才任稱人者
國相歲移名與計偕上尙書公府通調令得外補

順帝陽嘉元年以星變詔覈實選舉 按後漢書順帝本紀陽嘉元年閏十二月戊子客星出天苑
辛卯詔曰問者以來吏政不勤故災咎屢臻盜賊多有退省所由皆以選舉不實官非其人是天
心未得人情多怨書歌股肱詩刺三事令刺史二千石之選歸任三司其簡序先後情覈高下歲月
之次文武之宜務存厥衷

質帝本初元年桓帝卽位申嚴選舉之法 按後漢書桓帝本紀本初元年閏六月庚寅卽皇帝位
秋七月丙戌詔曰孝廉廉吏皆當典城牧民禁姦舉善興化之本恆必由之詔書連下分明懇惻而
所在翫習遂至怠慢選舉乖錯害及元元頃雖頗繩正猶未懲改方今百姓疲悴困於徵發庶望羣
吏惠我勞民蠲滌貪穢以祈休祥其令秩滿百石十歲以上有殊才異行迺得參選臧吏子孫不得
察舉杜絕邪僞請托之原令廉白守道者得信其操各明守所司將觀厥後

靈帝熹平六年蔡邕陳選舉之弊不報 按後漢書靈帝本紀不載 按蔡邕傳初帝好學引諸生能爲文賦者本頗以經學相招後多引無行趨勢之徒並待制鴻都門下熹平六年邕上封事其事曰臣聞古者取士必使諸侯歲貢孝武之世郡舉孝廉又有賢良文學之選於是名臣輩出文武並興漢之得人數路而已夫書畫辭賦才之小者匡國理政未有其能陛下卽位之初先涉經術聽政餘日觀省篇章聊以游意當代博奕非以教化取士之本而諸生競利作者鼎沸其高者頗引經訓風喻之言下則連偶俗語有類俳優或竊成文虛冒名氏臣每受詔於盛化門差次錄第其未及者亦復隨輩皆見拜擢旣加之恩難復收改但守奉祿於義已弘不可復使理人及仕州郡昔孝宣會諸儒於石渠章帝集學士於白虎通經釋義其事優大文武之道所宜從之若乃小能小善雖有可觀孔子以爲致遠則泥君子故當志其大者

獻帝建安十五年曹操下令舉賢才

按後漢書獻帝本紀不載

按三國魏志武帝本紀建安十

五年春下令曰自古受命及中興之君曷嘗不得賢人君子與之共治天下者乎及其得賢也曾不出閭巷豈幸相遇哉上之人不求之耳今天下尙未定此特求賢之急時也孟公綽爲趙魏老則優

不可以爲滕薛大夫若必廉士而後可用則齊桓其何以霸世今天下得無有被褐懷玉而釣於渭濱者乎又得無盜嫂受金而未遇無知者乎二三子其佐我明揚仄陋唯才是舉吾得而用之

魏

文帝黃初三年詔取士勿限年 按三國志文帝本紀黃初三年春正月詔曰今之計考古之貢士也十室之邑必有忠信若限年然後取士是呂尚周晉不顯於前世也其令郡國所選勿拘老幼儒通經術吏達文法到皆試用有司糾故不以實者

黃初四年詔博舉天下儁德茂才獨行君子 按三國志文帝本紀黃初四年夏五月有鸛鵲鳥集靈芝池詔曰此詩人所謂污澤也曹詩刺恭公遠君子而近小人今豈有賢智之士處於下位乎否則斯鳥何爲而至其博舉天下儁德茂才獨行君子以答曹人之刺

晉

成帝咸和六年三月癸未詔舉賢良直言之士 按晉書成帝本紀云云

咸和七年冬十一月壬子詔舉賢良 按晉書成帝本紀云云

簡文帝咸安二年詔所司舉隱逸之賢 按晉書簡文帝本紀咸安二年三月丁酉詔曰朕居阿衡三世不能濟彼時雍乃至海西失德殆傾皇祚賴祖宗靈祇之德皇太后淑體應期藩輔忠賢百官戮力用能蕩氛霧於昊蒼耀晨輝於宇宙遂以眇身託於王公之上思賴羣賢以弼其闕夫敦本息末抑絕華競使清濁異流能否殊貫官無牾政士無謗譴不有懲勸則德禮焉施且疆寇未殄勞役未息自非軍國戎祀之要其華飾煩費之用皆省之夫肥遁窮谷之賢滑泥揚波之士雖抗志元霄潛默幽岫貪居高尚之道以隆協贊之美孰與自足山水棲遲丘壑徇匹夫之潔而忘兼濟之大耶古人不借賢於曩代朕所以虛想於今日內外用官各勤所司使善無不達惡無不聞令詩人無素餐之刺而吾獲虛心之求焉

宋

武帝大明六年詔舉賢才 按宋書武帝本紀大明六年正月下四方旌賞茂異其有懷貞抱素志行清白恬退自守不交當世或識通古今才經軍國奉公廉直高譽在民具以名奏

廢帝永光元年詔舉賢才 按宋書廢帝本紀永光元年八月乙亥詔曰昔凝神佇逸磻溪讚道湛

慮思才傳巖毗化朕位御三極風澄萬寓思所以仰宣遺烈俯弘景祚每結夢庖鼎瞻言板築有劬日昃無忘昧旦可甄訪郡國招聘閭部其有孝性忠節幽居遯棲信誠義行廉正表俗文敏博識幹事治民務加旌舉隨才引擢庶官克順彝倫咸敘主者精加詳括稱朕意焉

明帝泰豫元年後廢帝卽位詔訪賢良 按宋書後廢帝本紀泰豫元年四月庚子卽皇帝位六月詔曰夫寢夢期賢往誥垂美物色求良前書稱盛朕以冲昧嗣膺寶業思仰述聖猷勉弘政道興言多士常想得人可普下牧守廣加搜採其有孝友聞族義讓光閭或匿名屠釣隱身耕牧足以整厲澆風扶益淳化者凡厥一善咸無遺逸

梁

武帝天監四年詔立限年解褐之制 按梁書武帝本紀天監四年春正月癸卯朔詔曰今九流常選年末三十不通一經不得解褐若有才同甘顏勿限年次 按文獻通考梁初無中正制年二十十五方得入仕

天監八年詔通一經者皆量加敘錄 按梁書武帝本紀八年五月壬午詔曰學以從政殷勤往哲

祿在其中抑亦前事朕思闡治綱每敦儒術軾闕闕館造次以之故負裘成風甲科間出方當置諸周行飾以青紫其有能通一經始末無倦者策實之後選可量加敘錄雖復牛監羊肆寒品後門並隨才試吏勿有遺隔

天監十四年親祀南郊詔舉賢良方正孝悌力田者按梁書武帝本紀十四年春正月辛亥輿駕親祀南郊詔曰朕恭祇明祀昭事上靈臨行宮而登泰壇服裘冕而奉蒼璧柴望既升誠敬克展思所以對越乾元弘宣德教而缺於治道政法多昧實佇羣才用康庶績可班下遠近博採英異若有確然鄉黨獨行州閭肥遯丘園不求聞達藏器待時未加收採或賢良方正孝悌力田並卽騰奏具以名上當擢彼周行試以邦邑庶百司咸事兆民無隱

太清二年夏四月詔舉清人任治民者五月詔求賢才按梁書武帝本紀太清二年夏四月丙子詔在朝及州郡各舉清人任治民者皆以禮送京師五月癸丑詔曰爲國在於多士寧下寄於得人朕晤於行事尤闕治道孤立在上如臨深谷凡爾在朝咸思匡救獻替可否用相啟次班下方岳傍求俊乂窮其屠釣書其巖穴以時奏聞

陳

陳承梁選舉限年之制 按文獻通考陳依梁制凡年未三十不得入仕惟經學生策試得第諸州迎主簿西曹左奏及常爲挽郎得未壯而仕

北魏

太宗永興五年詔遣使求賢 按魏書太宗本紀永興五年春二月詔分遣使者巡求僞逸其豪門疆族爲州閭所推者及有文武才幹臨疑能決或有先賢世胄德行清美學優義博可爲人師者各令詣京師當隨才敘用以贊庶政

世宗正始二年詔議貢士之方 按魏書世宗本紀正始二年夏四月乙丑詔曰任賢明治自昔通規宣風贊務實惟多士而中正所銓但存門第吏部彙倫仍不才舉遂使英德罕昇司務多滯不精厥選將何考陟八座可審議往代貢士之方擢賢之體必令才學並申資望兼致

文帝大統十一年宇文泰下令求賢 按魏書文帝本紀不載 按周書文帝本紀大統十年夏五月太祖入朝十一年春三月令曰古之帝王所以外建諸侯內立百官者非欲富貴其身而尊榮之

蓋以天下至廣非一人所能獨治是以博訪賢才助己爲治若其知賢也則以禮命之其人聞命之日則慘然曰凡受人之事任人之勞何捨己而從人又自勉曰天生儒士所以利時彼人主者欲與我爲治安可苟辭於是降心而受命及居官也則晝不甘食夜不甘寢思所以上匡人主下安百姓不遑恤其私而憂其家故妻子或有饑寒之弊而不顧也於是人主賜之以俸祿尊之以軒冕而不以爲惠也賢臣受之亦不以爲德也位不虛加祿不妄賜爲人君者誠能以此道授官爲人臣者誠能以此情受位則天下之大不可言而治矣昔堯舜之爲君稷契之爲臣用此道也及後世衰微此道遂廢乃以官職爲私恩爵祿爲榮惠人君之命官也親則授之愛則任之人臣之受位也可以尊身而潤屋者則迂道而求之損身而利物者則巧言而辭之於是至公之道沒而奸詐之萌生天下不治正爲此矣今聖主中興思去澆僞諸在朝之士當念職事之艱難負闕之招累夙夜兢兢如臨深履薄才堪者則審己而當之不堪者則收短而避之使天官不妄加王爵不虛受則淳素之風庶幾可反

北齊

北齊沿魏制置中正選舉諸郡又置學校課試秀孝俱得仕進 按北齊書儒林傳齊氏司存或失其守師保凝丞皆賞勳舊國學博士徒有虛名唯國子一學生徒數十人耳欲求官正國治其可得乎胄子以通經仕者唯博陵崔子發廣平宋遊卿而已自外莫見其人幸朝章寬簡政網疏闊游手浮惰十室而九故橫經受業之侶遍於鄉邑貢笈從官之徒不遠千里伏膺無怠善誘不倦入閭里之內乞食爲資憩桑梓之陰動逾千數燕趙之俗此衆尤甚齊制諸郡並立學置博士助教授經學生俱差逼充員士流及豪富之家皆不從調備員既非所好墳籍固不關懷又多被州都官人驅使縱有遊惰亦不檢治皆由上非所好之所致也諸郡俱得察孝廉其博士助教及遊學之徒通經者推擇充舉射策十條通八以上聽九品出身其尤異者亦蒙抽擢 按文獻通考北齊選舉多沿後魏之制凡州縣皆置中正其課試之法中書策秀才集書策貢士考功郎中策廉良天子常服乘輿出坐於朝堂中楹秀孝各以班草對字有脫誤者呼起立席後書有濫劣者飲墨水一升文理謚浪者奪席脫容刀